



Albertus ille filius fuit Alberti eius nominis quarti Austriae ducis, & Ioannae filiae Alberti senioris ducis Bavariae. De hoc eius patre atque Ernesto & Guilhelmo cognatis poetæ Germani mirabilia quaedam finxerunt, propterea quod in Terram sanctam profecti orbis mirabilia uiderunt. Rithmis enim gentilitijs tradunt, quod illi per caecas uias perruptis scopulis, splendore carbūculi inuenti, in Indiam usque penetrarint, atque rostratos homines & gigantum & pumilionum exercitus uiderint. Hic itaque moriens anno 1404 hūc filium Albertum quinquēnem tantum reliquit optimę spei puerum. Propterea patruelles Lupoldus, Fridericus,

& Ernestus, quum Austriae gubernationi insufficiens esset, tutores ei ordinati, idque maxima prouincię iactura. Dum enim quisque fratrum pro tutela cum alijs digladiatur, Austria laceratur ac scinditur, ipsa Vienna deuastatur. Interea tamen puer ab Andrea Blanco Garstensi parrocho, & Ramperto à Vualsee uiro strenuo in omnibus uirtutibus & melioribus literis instituitur.